


歷代 日記叢鈔

A traditional Chinese study desk with an open diary, brushes, and a lamp. The scene is dimly lit, with a warm, golden glow emanating from the desk. The diary is open, showing two pages of text. To the left, there is a brush holder with several brushes. A small lamp is visible in the background, casting a soft light. The overall atmosphere is one of quiet study and historical reflection.

學苑出版社

歷代日記叢鈔

第九〇冊



山左日記卷九

長沙粟奉之賡筵

光緒十一年己酉春三月初一日夜雨 去年首夏為
客白門勿勿十有二月矣人事蹉跎將去之齊魯同
人諗之爭相飲餞是午饒子敬復盛筵招飲既醉過
秦淮諸錄事小坐久識黃鶯都知惜別毋謂此中人
漫無情緒也久之出聚寶門時近黃昏風怒如虎
初二日 晡時俶裝劉斐如相約送之竹西遂與溯游
至下關旅次是夕也倚裘輾轉鄉夢依稀不徒春朋

輩之任離傷征夫之况瘁矣

初三日 日中附江孚輪船往京口連日大風從北來
下水舟無敢行者而輪船歷二時許即抵所屈計程
百八十里矣薄暮上銀山一覽山脉自京峴諸峯逶
迤而北石巒突起如臺左顧金山之秀右則焦山之
所砥柱勢既鼎足而名或遜之亦有幸有不幸歟夜
召丹徒妓過廡撥絃低唱祇益無聊

初四日 與劉斐如過慶樂園觀劇移晷而嚴步衢來
會步衢丹徒人也問訊之餘邀酌第一樓酒酣凭欄

視鐵甕城西北列屋成鱗浮舟若蟻獨其利權為泰
西各國攘竊已久枯中腴外致足慨矣是夕催邵伯
船往清江浦

初五日微雨夜止 曉發京口帆東南風渡揚子江緣
瓜洲而北入伊婁河細草沿隄襍英滿甸烟花三月
下揚州何如此耶泊廣陵城過午久矣論胡炳墀客
授此間訪之留宿

初六日 城西四五里有山蜿蜒而南勢若垣墉者蜀
岡者岡之麓濬泉引流為九曲池以東屬於城嘗時

名園別館交錯夫水濱畫舫歌菱紅橋問柳携客而
命妓者莫莫朝朝自宋歐陽修為郡守於蜀岡闢平
山堂我朝高宗南狩又從而褒嘉之蜀岡之
名于是益重雖復兵燹摧殘至今而江上之陳跡致
足眷也是晨同人出天甯門經天甯寺而北數十武
上梅花嶺史閣部可法瘞衣冠處今祠其側並供遺
像嗚乎可以慰忠魂矣折而西聚級上蜀岡佛殿巍
巍然樓其左曰平遠閣曰晴空右則平山堂也純
廟御製詩並摩堂上宸藻輝煌穆然想聖世容

熙之樂登堂望遠則江南諸山拱揖檻前北極平蕪
莽蒼無際渺茲江都非王淠之所經營而帝場之所
流連耶蓋盛衰之感自昔而然矣方徙倚間寺僧出
伊蒲饌相餉並導之觀院中花木及張又新所品第
五泉因更試茗而下緣九曲池東向憩湖上草堂復
東過橋觀法海寺浮屠七級劫餘泉石寥寥若此則
夫玉鉤金帶曾何足云哉日夕入城投宿彭子熙處
初七日 黃昏招同胡炳墀段和山諸君酌香雲校書
處濁酒澆愁嬌歌眷別勿勿夜將半矣炳墀更送之

出城就宿舟次

初八日 已刻與胡炳堦劉斐如作別南風江上春日
更融滿曳布帆過露筋祠夕陽盪波矣是夕泊北車
路

初九日 聞易姻丈熙潭客高郵州辰刻經其地招之
來會方暢叙間舟子以風利促別恨不少留與之造
文游臺畔繼長公載酒論文之樂也過界首高郵寶
應分界處長隄小市映帶楊柳小鴨十餘頭往來啞
喋成趣過寶應縣星月在天戍鼓初動顧是時南風

正急長年欲趁夜行約莫至頭鋪寄斫村犬狺狺殆
將旦矣

初十日 揚帆過淮安府日朝而市野叟村姑咸集驢
負車載漸饒北方風味至清江浦視日方中既樣舟
探詢前路陸行偶乏車水行則天妃閘急溜難上且
淮南運河船無願去北運河者乃僱小車循隄十八
里取道楊莊地在天妃閘上游北運河之委也少有
村市是時漕艘絡繹役夫數萬人見轉輸之盛薄暮
僱小湖船去濟寧州船隘至不能伸首舒足委心任

運仍自得之

十一日 黎明發楊莊水清流急風檣之勢微浪有聲激
七十五里眾興集小泊河以西數里當黃河故道之
濱即桃源縣縣本宿遷之桃園鎮元初置縣後訛園
為源其時桃花未盡菜花已開目極春郊麥漸漸盈
野五十里泊大王廟倚舷望月鄉心如擣

十二日 三十里白洋河當巳午之交風雨顛狂守候
至日朕牽行五里泊陸家村

十三日 帆風三十里宿遷縣小泊丁丑春初曾過縣

城一覽萍梗悠悠再來已九年矣故我依然良用嗟
悼四十里十字河沂水正流會駱馬湖水入運處五
十里窯灣邳州屬境街衢亘里許右納一水詢之士
人每歲漲發可迺此水經駱馬湖北達沂州府也既
泊觀土人賽會旂蓋翻風金鼓動地從窯灣渡河而
西歡聲發於水上

十四日 舟行北運河中長隄如虹槐棗分蔭蕭條茅
屋時藝麥菽視蘇常運河華實有間矣三十里貓兒
窩左納盆頭湖及舊邳州水今汜二十七里沂水支

津經邳州南境入運河處泗沂之流至此畢合今皆引之以濟運矣其時大雨如注三里泊徐塘口雨止而大風復作夜半始息

十五日 牽行十八里泃口東西泃水口也十七里梁王城北入山東嶧縣界十五里泊臺兒莊前去濟寧州尚三百餘里水淺難上遂變計陸行且樂為洙泗之游焉楊莊至此計程三百九十里

十六日 臺兒莊嶧縣東南舟車之會也運河自西而南緣隄列肆狀如初月是日僱二人車往濟南府預

數客程凡六百六十六里

十七日大風 日出開車十八里馬蘭屯前此過巨龍
河嶧縣諸泉之所匯也石梁修整河以東有蕭望之
故里碑三十六里陰平社道左有碣題漢陰平長表
安舊治居民數十家望衡對宇詢之無能詳其事者
十二里周家營宿

十八日 曉風甚寒十八里楊家庄漢匡衡故里七里
沙溝營六十里官橋中途過西桑橋盤龍河水所經
亦呼薛河近孟嘗君封地感詠一律客行感遲暮徒

倚石梁陰野潤麥苗秀春殘榆葉深舊封餘斷碣遠
道重孤吟宛轉薛河水應憐好士心官橋夏車正奚
仲國也春秋薛國戰國時齊滅之以封田嬰二十里
宿南沙河于古為潞水左傳襄十九年取洙田自潞
水是矣

十九日 車行滕薛之境峰回嶂疊鬱乎蒼蒼而其西
則流雲委地遠樹際天百里侯封規模偉矣二十里
滕縣春秋滕國城外東南隅有滕文公祠縣東六里
有郟城故址春秋郟國後更為小邾即其地矣四十

里界河入鄒縣境引領望嶧山玲瓏峭特崢嶸接天
云其中孔穴洞達避兵者恒倚之孤桐之種間有存
者北向二十五里投宿二夏店適當嶧山之麓仰視
數峰浪湧欲斷仍連乃晤嶧悟又作繹之義然郭璞之
訓繹也謂其山純石積構連屬如繹絲然似更得之
二十日 黎明就道東望鄒繹山雲蒸蒸如釜上氣二
十五里鄒縣春秋邾國魯繆公改邾曰騶晉時置縣
始從鄒矣城南有孟子廟東西廡並祀公孫丑萬章
諸子坊其外為樵星門堂殿之制視郡縣文廟稍遜

然丹垣峻陞極尊嚴之觀廟後隔隍負郭更為堂數楹存孟母斷機遺址凡孟氏子孫襲翰林院五經博士者署其傍不廢北距茲二十五里鳧村則孟子故里也村東北數十步馬鞍山之麓孟林在焉饗殿闕寂門扃不可入封其右為孟子父母墓顏松恠栢垂蔭百畝孟氏子孫祔葬者纍纍今七十代矣三遷之教七篇之訓童時所服膺也廟堂廬墓仰瞻千載不尤低徊難去哉二十五里廂曲阜縣東門外少昊氏故都也春秋魯國城南雩水統之即浴沂之沂源出

尼山西北流入泗雩南舊有舜雩壇樊遲從遊處亦
曾點所云風乎舞雩者時當春暮想詠歸之樂

二十一日 蚤起繞城而北謁孔林古株夾道中途緙
楔曰萬古長春約二里長垣繚之門外有坊曰至聖
林既入甬道百餘步臺門高峻上覆以樓再入而西
過洙水橋蘋藻滌洄清泚可鑑折而北歷墓門享殿
循石道稍西拜孔子墓南向隆起如阜馬鬣封之謂
也著草萌其上墓左列泗水侯墓左之前沂水侯墓
並峙而三余既循墓右憩子貢廬更東歷二亭宋真